

Na osnovu člana 63. stav (1) tačka d) i člana 78. stav (1) Zakona o visokom obrazovanju (prečišćeni tekst) ("Službene novine Tuzlanskog kantona", broj: 21/21), i člana 52. stav (1) tačka b) u vezi sa tačom s) istog člana Statuta Univerziteta u Tuzli, Senat Univerziteta na sjednici održanoj 12.01.2022. godine donio je

P R A V I L N I K O VOĐENJU REGISTRA DOMAĆIH PUBLIKACIJA

Član 1.

- (1) Ovim pravilnikom se uređuje način formiranja i vođenja Registra domaćih publikacija (dalje: Registar).
- (2) Pod publikacijom se podrazumijeva objavljena naučna knjiga, naučna monografija, univerzitetski udžbenik ili knjiga, naučni rad objavljen u naučnom časopisu, zborniku konferencije, simpozijuma, kongresa, umjetnički rad i sl.

Član 2.

- (1) Registar domaćih publikacija Univerziteta u Tuzli (dalje: Univerzitet) održava Ured Prorektora za naučnoistraživački rad i čini ga javno dostupnim putem web stranice Univerziteta.
- (2) Kada se steknu uvjeti Univerzitetska biblioteka preuzima obavezu održavanja Registra.

Član 3.

- (1) Senat Univerziteta donosi odluku o uvrštavanju domaćeg časopisa, zbornika radova sa konferencije, simpozijuma, kongresa i knjige u Registar, na prijedlog naučno-nastavnog/umjetničko-nastavnog vijeća fakulteta/Akademije, dva puta godišnje: i to na početku ljetnog semestra i na početku zimskog semestra tekuće akademske godine.
- (2) U Registar se mogu unijeti publikacije koje ispunjavaju kriterije utvrđene u članovima 4., 6. i 8. ovog Pravilnika.

Član 4.

Kriteriji za uvrštavanje knjige u Registar su sljedeći:

1. Da je recenzirana od strane najmanje (2) dva recenzenta izabrana u naučno-nastavno zvanje na istoj ili srodnoj oblasti na koju se knjiga odnosi;
2. Da je objavljena u punom obimu u štampanoj formi ili objavljena u punom obimu u elektronskoj formi na web stranici Univerziteta ili elektronskom prenosivom mediju;
3. Postupak katalogizacije domaće knjige treba da je izvršen po međunarodnim i domaćim standardima (CIP katalogizacija).

Član 5.

Knjiga uvrštena u Registar ostaje trajno u Registru.

Član 6.

Kriteriji za uvrštavanje časopisa u Registar su sljedeći:

1. Časopis se objavljuje najmanje jednom godišnje na bosanskom i/ili engleskom jeziku u štampanoj i/ili elektronskoj formi;
2. Uredništvo časopisa uključuje najmanje jednu trećinu članova izvan Bosne i Hercegovine;
3. Časopis mora biti indeksiran u nekoj od međunarodnih baza naučnih časopisa.

Član 7.

- (1) Časopis se vodi u Registru jednu godinu od dana uvrštavanja, a nakon toga se automatski briše iz Registra. Ponovno uvrštavanje u Registar provodi se u skladu sa članom 3. ovog Pravilnika.
- (2) Sva izdanja časopisa tokom kojih je časopis bio uvršten u Registar ostaju trajno u Registru.

Član 8.

Kriteriji za uvrštavanje Zbornika radova sa konferencije, simpozijuma i kongresa (dalje: Zbornik) u Registar su sljedeći:

1. U Zborniku, radovi su objavljeni u punom obimu na bosanskom i/ili engleskom jeziku, u štampanoj i/ili elektronskoj formi;
2. Programski odbor konferencije, simpozijuma i kongresa uključuje najmanje jednu trećinu članova izvan Bosne i Hercegovine;
3. Na listi recenzenata Zbornika najmanje jedna trećina članova je izvan Bosne i Hercegovine;
4. Postupak katalogizacije Zbornika radova treba da je izvršen po međunarodnim i domaćim standardima (CIP katalogizacija).

Član 9.

- (1) Zbornik se vodi u Registru jednu godinu od dana uvrštavanja, a nakon toga se automatski briše iz Registra. Ponovno uvrštavanje u Registar provodi se u skladu sa članom 3. ovog Pravilnika.
- (2) Sva izdanja Zbornika tokom kojih je zbornik bio uvršten u Registar ostaju trajno u Registru.

Član 10.

Domaće publikacije koje se uvrštavaju u Registar moraju striktno ispunjavati sve kriterije utvrđene članovima 4., 6. i 8. ovog Pravilnika

Član 11.

Ovaj Pravilnik stupa na snagu danom donošenja, a objaviće se na oglasnim pločama fakulteta/ADU i na web stranici Univerziteta.

Stupanjem na snagu ovog Pravilnika prestaje se primjenjivati Pravilnik o vođenju registra domaćih publikacija broj: 03-3895-6/10 od 26.05.2010. godine.

UNIVERZITET U TUZLI
SENAT

Broj: 03-77-1-2/22
Tuzla, 12.01.2022. godine

PREDSJEDAVAJUĆI SENATA

po ovlaštenju

Dr. sci. Amir Karić, vanr. prof.